

O B R A Z L O Ž E N J E

UZ NACRT PRAVILNIKA O PROIZVODNJI ELEKTRIČNE ENERGIJE ZA VLASTITE POTREBE

Regulatorna komisija za energiju u Federaciji Bosne i Hercegovine – FERK ovim obrazloženjem objašnjava pravnu i činjeničnu osnovu za donošenje Nacrta pravilnika o proizvodnji električne energije za vlastite potrebe.

Obrazloženje je izrađeno da bi se omogućilo javnosti razumijevanje pravnog osnova koju FERK mora uvažavati u postupku donošenja opštih akata kojima se, na osnovu zakonskog ovlaštenja, na opšti način uređuju pravni odnosi u cilju razrađivanja i primjene pojedinih zakonskih odredbi u vezi postupanja operatora distributivnog sistema po pitanju sticanja statusa prosumera i prosumera koji djeluju zajednički, u realizovanju neto mjerenja i neto obračuna i utvrđivanja vrijednosti energetske i monetarne kredita, zatim kod promjene snabdjevača prosumera i u vezi drugih pitanja od važnosti za djelovanje prosumera.

I PRAVNI OSNOV

Zakon o korištenju obnovljivih izvora energije i efikasne kogeneracije („Službene novine Federacije BiH“, broj 82/23)

Članom 3. stav (1) tačka pp) Zakona o korištenju obnovljivih izvora energije i efikasne kogeneracije propisano je da prosumer označava krajnjeg kupca električne energije, koji proizvodi električnu energiju iz obnovljivih izvora energije i efikasne kogeneracije za dio svojih potreba iz vlastitog energetskeg postrojenja sa mogućnošću predaje više proizvedene električne energije u mrežu u vidu energetskeg ili monetarne kredita.

Član 50. istog zakona propisuje da FERK donosi Pravilnik o proizvodnji električne energije za vlastite potrebe, kojim se bliže propisuje: a) način i uslovi sticanja statusa prosumera i prosumera koji djeluju zajednički, b) djelovanje prosumera i prosumera koji djeluju zajednički, c) postupci operatora distributivnog sistema u realizovanju neto mjerenja i neto obračuna, d) primjena ograničenja instalisane snage elektrana za vlastite potrebe, pojedinačno i na nivou sistema, e) primjena neto mjerenja i neto obračuna i način postupanja u slučaju promjene snabdjevača, f) način utvrđivanja vrijednosti energetskeg i monetarne kredita, g) sigurnosni i tehnički zahtjevi za instalacije elektrane, h) vođenje evidencija i energetska statistika, i) druga pitanja od značaja za implementiranje šema neto mjerenja i neto obračuna.

II RAZLOZI ZA DONOŠENJE PRAVILNIKA

Na osnovu navedenog, a u cilju izvršenja svoje regulatorne nadležnosti, FERK je utvrdio Nacrt pravilnika o proizvodnji električne energije za vlastite potrebe. Tom prilikom FERK je imao za cilj propisati jasna pravila, koja se odnose na sticanje statusa i djelovanja prosumera i prosumera koji djeluju zajednički, te na postupanje operatora distributivnog sistema i snabdjevača u odnosima sa prosumerima. Istovremeno, FERK se vodio opštim ciljevima rada, propisanim Zakonom o energiji i regulaciji energetskeg djelatnosti u Federaciji Bosne i Hercegovine („Službene novine Federacije BiH“, broj 60/23), kao i ciljevima, koji su postavljeni Zakonom o korištenju obnovljivih izvora energije i efikasne kogeneracije.

S obzirom na naprijed navedeno, FERK se opredijelio za regulisanje ove materije kao u Nacrtu pravilnika o proizvodnji električne energije za vlastite potrebe.

III PREDMET RAZMATRANJA PRAVILNIKA

Nacrtom pravilnika o proizvodnji električne energije za vlastite potrebe propisani su način i uslovi sticanja statusa prosumera i prosumera koji djeluju zajednički, djelovanje prosumera i prosumera koji djeluju zajednički, postupci operatora distributivnog sistema u realizovanju neto mjerenja i neto obračuna, primjena ograničenja instalisane snage elektrana za vlastite potrebe, pojedinačno i na nivou sistema, primjena neto mjerenja i neto obračuna i način postupanja u slučaju promjene snabdjevača, način utvrđivanja vrijednosti energetskog i monetarnog kredita, sigurnosni i tehnički zahtjevi za instalacije elektrane, vođenje evidencija i energetska statistika.

IV SVRHA OBRAZLOŽENJA

Svrha Obrazloženja je informisanje javnosti o činjeničnim i pravnim osnovima Nacrta pravilnika o proizvodnji električne energije za vlastite potrebe.

Ukoliko se iz sažetka komentara zainteresovanih lica ocijeni da je neophodna suštinska revizija Nacrta pravilnika, FERK će obnoviti postupak opšte rasprave, u skladu sa članom 36. stav (2) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“, broj 95/23) i članom 12. stav (2) Pravilnika o javnim raspravama („Službene novine Federacije BiH“, broj 95/23).

Ukoliko su komentari takve naravi da ne zahtijevaju suštinsku izmjenu ili ukoliko FERK odluči ne vršiti reviziju predloženog teksta, isti će staviti na dnevni red redovne sjednice, razmotriti i usvojiti.

V PLANSKE AKTIVNOSTI FERK-a

Nacrt pravilnika o proizvodnji električne energije za vlastite potrebe FERK je usvojio na VIII redovnoj sjednici održanoj 4.4.2024. godine. Obavještenje o održavanju sjednice objavljeno je 29.3.2024. godine, na službenoj internet stranici FERK-a.

Uz Nacrt pravilnika, FERK je na istoj sjednici usvojio i tekst Obrazloženja uz ovaj nacrt i utvrdio tekst Obavještenja za javnost, za prikupljanje komentara i održavanje usmene opšte rasprave. Obavještenje za javnost za prikupljanje komentara i održavanje usmene opšte rasprave tokom koje će FERK primati komentare javnosti, objavit će se na službenoj internet stranici FERK-a.

Zainteresovana pravna i fizička lica mogu podnositi pisane komentare na Nacrt pravilnika o proizvodnji električne energije za vlastite potrebe u periodu od dana objavljivanja obavještenja do dana isteka roka za podnošenje pisanih komentara. Nacrt pravilnika sa Obrazloženjem moći će se preuzeti u sjedištu FERK-a, na protokolu, Kneza Domagoja 12 A u Mostaru ili na službenoj internet stranici FERK-a www.ferk.ba, u periodu od 4.4. do 16.4.2024. godine, kada ističe rok za podnošenje pisanih komentara. Pisani komentari moraju biti potpisani.

FERK će održati usmenu opštu raspravu o Nacrtu pravilnika 15.4.2024. godine, u Mostaru, u prostorijama FERK-a, sa početkom u 12:00 sati.

Na usmenu opštu raspravu mogu doći sva zainteresovana pravna i fizička lica, kojima će se pružiti mogućnost davanja komentara na Nacrt pravilnika. Vremenski rok za davanje komentara bit

će ograničen u skladu sa uputstvima datim tokom usmene opšte rasprave. Voditelj rasprave je lice koje odredi FERK.

Svi primljeni pisani i usmeni komentari će biti pažljivo razmotreni, te će isti uz izvještaj voditelja postupka sa opšte rasprave biti objavljeni na službenoj internet stranici FERK-a.

Prijedlog Pravilnika o proizvodnji električne energije za vlastite potrebe pripremljen od voditelja postupka opšte rasprave bit će razmatran u svrhu usvajanja na redovnoj sjednici FERK-a koja će se održati u skladu sa planom rada FERK-a o čemu će javnost biti blagovremeno obaviještena.

Kada bude usvojen, Pravilnik o proizvodnji električne energije za vlastite potrebe se dostavlja na objavu „Službenim novinama Federacije BiH“.

FERK zadržava pravo izmjene ovih planskih aktivnosti.